

PETRUS POLANUS⁷³

DUX XXXVI.

Creatus Anno 1130. Obiit Anno 1148.

VETVS ELOGIVM.

*Fanum sub mæ tributarium efficitur : Monasteria Sanctorum Clementis,
& Iacobi de Palude construuntur.*



Relectis per Michaellem infulisejus gener subrogatur Petrus Polanus:cujus tempore Fanum-Fortunæ, proprio Numine desertum à proximis Pisauri, & Senogalliæ populis, crebris oppugnationibus infestatum, hosti manus dabat, ni ad Venetæ virtutis fortunam confugisset. Hac unà favente servatum; nam immisâ clâsse, cæso hoste, urbs libertate redemptâ ad memoriam beneficii, stato pro viribus tributo, Veneti Imperii facta est vectigalis. In Patavinos etiam, qui aggeres Meduaci fluminis subvertebant, ut aquæ sterilibus paludibus urbem Venetam obsepirent, ad Tumbam pugnatum strenuè, & quantum aquæ Patavini infuderant; tantum sanguinis profuderunt, captis eorum tercentis quinquaginta nobilibus.